

四庫全書

集部

欽定四庫全書

集部

四明文獻集

目錄  
卷二

詳校官庶吉士臣張溥

主事臣呂雲棟覆勘

覆校官中書臣汪師曾

校對官中書臣王鍾泰

校對官監丞臣張曾炳

謄錄監生臣畢所誦

謄錄監生臣沈成均

欽定四庫全書

集部四

四明文獻集

別集類三宋

提要

臣等謹按四明文獻集五卷宋王應麟撰應麟有周易鄭氏注已著錄所著深寧集本一百卷然宋志已不著錄焦竑國史經籍志亦不載其名則散佚久矣此本乃明鄞縣鄭真陳朝輔所輯四明文獻之一種故一人之作

冒總集之名也通一百七十餘篇制誥居十之七蓋据拾殘賸已非其舊矣應麟以詞科起家其玉海詞學指南諸書賸馥殘膏尚多所沾溉故所自作無不典雅溫麗有承平館閣之遺且所載事迹多足與史傳相證如宋史應麟本傳謂度宗即位應麟草百官表循舊制請聽政四表已上一夕入臨宰臣諭旨增撰三表考之是集則第一表至第二表乃

景定五年十月上第三表至第七表乃十一月上與本傳互異又宋史度宗本紀載賈似道罷都督予祠在德祐元年二月徙居婺州又徙建寧俱在七月而由揚州責歸紹興實是在是年五月四日見于是集責賈似道歸里制亦足以補本紀之闕則雖零章斷簡固亦不以殘缺棄矣乾隆四十一年十月恭校上

總纂官臣紀昀臣陸錫熊臣孫士毅

總校官 臣 陸費墀

欽定四庫全書

集部四

四明文獻集目錄

別集類三 宋

卷一

記

序

跋

卷二

赦文

詔

卷三

表

露布

檄文

卷四

制

祭文



樂章

卷五

誥

墓誌

贊

詩



欽定四庫全書

四明文獻集卷一

宋 王應麟 撰

記

周山川圖記

詞科第一場  
二月十二日

相古先民有周德隆澤洽用造區夏章亥所步莫不砥  
礪建索戢武弁藻王度四獄河海咸秩無文名頌曰般  
稟時之對鄭玄釋允猶兪河之語謂按山川圖次序祭  
之孔氏正義謂共為一圖雖畿籍方志湮軼亡傳謹專

繹舊聞而為記曰太極肇分有浮而清有治而興卷石  
之積結為巍巍雲蒸雨霈萬物育焉勺水之積融為浩  
浩源迤流行萬物潤焉聖人有作迺封迺禘迺濬迺滌  
肇稱明祀為民祈禱若封禪于黃望秩于虞旅祭于禹  
維見可觀然風后受圖九則始布山海有經為篇十三  
圖牒猶未詳也蒼姬開統憲章稽古以地圖知山川之  
數職于司書以地圖辨山川之名物職于大司徒以九  
州圖知山川之阻職于司險天下之圖職方直掌其山

鎮曰會稽衡華曰沂岱嶽及醫無閭霍常其大川曰三  
江江漢曰滎雒淮泗曰河泃涇汭及漳虘池嘔夷又有  
山師川師掌其名山虞川衡掌其守良兼兌麗目擊掌  
運抑猶以為畧也卑高小大則其位殊次生屏攝則其  
數異我是以有秩祭之圖河先海後辨源委也九河合  
一同等列也嶽視三公瀆視諸侯禮文別也天子四望  
諸侯三望名分嚴也按圖定序因序藏事於是宗伯為  
壇典瑞奉璋牧人毛牲校人飾駒乃奏蕤賓歌函鐘舞

大夏服毳冕而祀焉上下有章無越望之僭祝史薦信  
無矯舉之愧山澤通氣歆馨降嘏百嘉營楙四極艾寧  
盛哉鏢乎遙觀詩序祀於巡守時邁其邦爰及牝望意  
者土訓夾車道圖詔事其在斯時與攷之傳記天下名  
山五千三百七十名川三百支川三千周國其在雍州  
而立華嶽為西嶽三代居河洛而四瀆咸在山東公羊  
春秋謂天子有方望之事何休以為望祭凡三十六所  
若義之修而禮之歲獨於般詩見之夙夜愍祀作周恭

先丕天之定律也下逮穆王大朝黃山披圖視典殷武  
疏述鄭玄之言亦參周漢之域驗山川之圖孔安國為  
漢博士具見圖籍山川所在學者尚有稽焉春官掌三  
辰之法猶神示之居注亦訓猶為圖仰觀俯察兩盡其  
摯矣雖然德懋而山川寧道公而百川理懷柔河嶽厥  
有本元無設官為極之意則經野之圖不足以致治無  
敬德祈天之忱則卜洛之圖不足以永年是圖之陳左  
右也顧岐陽豐水而念王業之孔艱瞻洞庭孟門而監

地險之難恃江漢想廣及之德南山思疆理之功清明  
在躬與山川出雲同一運化然後能靈承于旅惟典神  
天業我濛鴻洋洋如在玉帛云乎哉茲圖外之眇指敢  
正列其義以詔萬世謹記

按辭學指南云記者紀事之文也西山先生曰禹貢武  
成金縢顧命記之屬似之文選止有奏記而無此體古  
文苑載後漢樊毅修西嶽廟記其末有銘亦碑文之  
類至唐始盛獨孤及風后八陣圖記今之擬題倣此

漢百官朝會殿記

皇漢稽古建官立三公應台鼎司徒為丞相之任贊元



穆綽位冠列辟中興二葉憲度鴻明號登承平越十五  
載更作司徒府於開陽門內光觀壯麗萬國具瞻迪惟  
詢謀僉同虞書垂訓謀及卿士禹範陳法時有大政政  
有大疑必集羣臣議之咨一相決之迺於司徒府建朝  
會之殿呂繹師言審國是煥乎一代閱規也棟宇修廣  
史策無述獨於周禮注漢官儀律歷百官志注概見顛  
末庸識其事弓禪史闕太微中居列宿環拱聖王正表  
著之位辨廉陸之等法虐天也蒼姬制禮天子三朝燕

朝列路寢之庭太僕掌之治朝居路門之外宰夫司士  
職之惟時外朝眡內為重雉門外者小司寇以詢萬民  
三公州長暨羣吏叙進臯門內者朝士掌建其法孤卿  
大夫暨衆庶咸列蓋建朝於外則尊卑之分肅咨謀於  
朝則上下之情孚公聽並觀訂謨定命聚精會神之地  
其可忽諸漢監秦轍達聰垂明高皇肇基下詔長樂相  
國建議寔始權輿或大議致中或會議温室朝堂百僚  
之位有蕭曹魏邛之謀謨公卿以下朝會坐載於成紀

建始元年之注坐而論道流風猶存丞相府有四門隨時聽事坐未央廷中單于拜謁體貌匪不嚴也然問望之計策則遣中朝持單于之語則視中朝具復廟之文則言中朝臣議王嘉之事則下將軍中朝者丞相以下為外朝顧不與焉官府體分與同異矣黃霸問郡國計吏舉孝弟為一輩先上殿說者謂丞相所坐外朝之制畧而未詳東都重熙印憲周典德陽朝羣后象魏旌舊章上儀祲容焜燿千古睠詹公府輪奐未崇經之營之

適彰廣殿彤庭殖殖左城右平王侯更衣於殿之西位  
宁森嚴規撫璉敞克衢室舜總章何以侈茲國有大議  
車駕親幸其殿則應劭之書可證百官會府公殿下則  
蔡邕之言可稽續志通紀熹平四禩臣光臣晃傳奏歷  
元乙卯詔書會司徒府議邕集所載在三月九日其位  
校尉東面侍中中郎將大夫千石六百石南面議郎博  
士北面戶曹令使西面中坐讀詔臣邕前坐侍中西北  
近公卿與光問難朝章邦典賁然明著想夫三事在位

百辟在庭周爰咨諏知畧輻湊帝聯下囑稱制臨決衡  
石公論著蔡羣疑匪同會同有繹而已故龍闕對峙棖  
題翬飛人不以為華鈴鼓不設扉闥洞闈人不以為簡  
鳴玉綦冕翼翼翔翔吏治否臧民生休戚天聰四闡無  
隱不敝受計則計吏數百人拜于庭中舉謠言則掾屬  
令史會于殿上崇輔弼以尊國體意深遠哉若乃論于  
白虎朝于雲臺見于宣明問于崇德隆寬盡下史不絕  
書兼聽廣謀莫若斯殿康成釋禮兼述漢法於朝士曰

令司徒府有天子以下大會殿亦古外朝於葉人曰百  
官朝會殿天子與丞相舊決大事是外朝之存者劉昭  
謂干寶之說殆未深考小宗伯肆儀為位康成謂若今  
肆司徒府又非止為大會殿矣蔡邕納書東觀立朝會  
志未就詳莫得聞竊嘗考之周中朝聽治漢前殿也周  
內朝圖嘉事漢宣室也東都前殿為路寢嘉德為燕息  
見於張衡之賦而景秉傳云公卿會議當上殿訪邊事  
若柔安班勇皆於朝堂上書會議又有名百官議朝堂

詔百官大會朝堂亦外朝遺意通典曰周有四朝而言  
三朝者詢事非常朝也是殿其詢事之朝歟聘禮君與  
卿圖事康成曰謀事者必因朝其位君南面卿西面大  
夫北面士東面漢制蓋如此云謹記

### 唐七學記

有唐觀人文化天下高祖太宗戢兵耆武尊右儒術綴  
禮正樂憲度著明庠聲序音鏘訇金石稽古建學厥制  
維六立宗纘緒復增其一課試有法訓迪有師德藝兼

該揔于冑監譽髦斯士雲合霧集豐規茂矩冠冕百王  
宜祓厥文具詳登載謹參合百官選舉志儒學傳序六  
典會要而記其畧夫教亦多術矣開數路而翕受皇極  
之化也萃羣材

闕

上下夏氏設教序列東西左右郊宮

商學殊制作人造士匪一而足蒼姬之盛教典尤備國  
學合子弟太學食老更四郊有庠門闈有學或讀邦法  
或習書數達材成德道化渾融祭義攸述為學有四保



傳所紀為學有五學記之注曰內設師保外有庠序六學之制於茲可考治古逾遠彞憲無傳漢立三雍晉興兩學元嘉四學之制天監五館之開名實存亡駁虐亡議惟唐文治炳蔚上軌成周鉏類夷荒鴻業甫定生員之置肇于武德元年五月周孔之祠建于二年六月恢儒鄉學敷遺後聖爰登正觀駿惠前猷臨幸國庠延籲儒彥肄業之舍廣為千二百區著錄之生益為三千二百六十員施于六葉增闢學館襲舊為七若三品以上

子孫國子學教之五品以上子孫太學教之曰廣文以  
領國子生之業進士者寔維天寶九載七月乙亥之制  
曰四門以授七品之子及庶人之俊異者寔維元魏太  
和二十年之制律學昉於晉梁復於正觀六年之二月  
又復於龍朔二年之五月越明年以隸詳刑而律令格  
式法例於是習焉書學昉於晉隋復於正觀二年之十  
二月又復於龍朔二年之五月越明年以隸蘭臺而石  
經說文字林於是習焉算學沿隋之舊置於正觀二年

復於顯慶元年越三年九月廢之以隸太史及龍朔二  
年復之以隸秘書而九章五曹綴述緝古之屬於是習  
焉訓導之職有祭酒司業博士助教直講孫其業也舉  
選之科有秀才明經俊士進士明法明字明算興其能  
也業成則丞蒞試不率則簿舉法嚴其訓也國子有五  
經博士廣文有知進士助教重其選也助教或十年使  
遷博士或十九年不易顛其任也生徒之數國子二百  
人太學五百人四門千三百人書律及算總百十人元

和六禩申命更定西京自八十至十人東都自十人至二人而國子學有大成上元二年初置二十人開元二十年復省其半若舍奠齒胄之儀皆行於國子學又本末先後之序也想夫紆袂鼓笥來游來歌鴻生碩師論難衍衍拱紱懷璽濡化染學玄武飛騎垂衿講習新羅百濟挾策吟誦豐芑燕翼之澤棧樸追琢之章政媿俗淳作周匹休猗歟懿哉鋪觀唐史立學闡教蓋非一端左省弘文武德之制東宮崇文政觀之規並置生員是

為二館秘書小學以誨皇族內之學館以訓宮掖崇立  
有學以習老莊郡縣諸生差列二等若崇化厲賢之原  
則自七學始以至龍朔改司成館垂拱更成均監司成  
宣業官名屢易茲不備載按鄭虔傳廣文寓治國子館  
李虔西都賦曰左立太學前到廣文選舉志止言六學  
何蕃傳亦云六館意者二學合為一與韓愈上表有七  
館之稱併書以識舊典謹記

慶元府學重建大成殿記

天子初郊見之歲法駕視學謁款先聖濟曾子子思侑饗建首善風四方罔不丕式彛訓越百歲吏部尚書洪公以敷文閣學士來牧四明秋舍奠於學顧瞻禮殿梁棟彫剥喟然曰大哉聖人之道於穆不已惠我無疆矧東漸于海遠溯洙泗簪紱之盛擬鄒魯職在宣化弗惟道原是崇曷克稱明詔若稽郡乘舊夫子廟肇自唐正元四年至今四百八十餘歲矣元氣回復理若有待明年寔咸淳紀號之六年迺鳩工飾材而鼎新之屬通判

府事陳君宗觀察推官汪君大有庀其事二月庚寅經始七月庚戌告成穹棟碩楹奐奕嚴敞視昔有加焉已未虔妥用幣衿佩雲會相與端拜而議曰吾邦自慶厯諸老淑艾後進乾淳大儒闡繹正學孝弟修於家而仁遜興德齒尚於鄉而風俗厚理義明於心而賢才盛善信充於已而事業顯成我者夫子也聖天子立教於上而夫子之道益尊賢師帥迪教於下而夫子之道益彰夫道者治之本其功與天地並世之言治者謂古道不

可以御今先政刑後教化道寔微而俗滋薄獨我公眇  
覲天衷民彛之統紀急衆人之所緩可謂知本矣昔魯  
僖公能修泮宮威德所被至于海邦夫子刊其詩於頌  
而先儒傳春秋則曰學校為國之先務雖用民力不可  
廢也故不與新作南門槩書之策今公茲舉合詩春秋  
之義蓋有魯侯文武之德而本之寬儉用能豐道扶教  
作新數百年幾墜之緒盛德至善百世不忘也於是郡  
博士沈君德初鄭君信甫請書成事於石應麟世家鄞



幸得從先生長者後升堂而聞金石之音入宮牆而見宗廟之美惟遊於聖人之門難為言曷敢贊一辭竊惟聞之論語始之以君子終之以君子學者所以學為君子也凡我同志服膺聖訓陟降庭止昭格不違上以承天子之休德下以篤師帥之善教罔俾克廣德心專美魯之多士尚其懋哉公名闕於潛人端平文忠公之仲子學問政事得於文獻之傳宅牧期年治理效彬彬可紀特書其大者以詔無斁八月望日朝散郎秘閣同修

撰知徽州軍州兼管內勸農營田事節制軍馬王棊撰  
慶元路重建儒學記

四明自唐為州始有夫子廟宋始建學規模豐敞棟宇  
穹窿庠聲序音冠於浙左英俊之域絃冕所興文獻蓋  
彬彬矣至元十有九年春學燬於融風教授潘夢柱黃  
裳吳宗彥厯載繕葺經始禮殿門廡齋舍寔以畧具講  
經有席養蒙有堂皆草創未就二十八年冬肅政廉訪  
副使陳公祥下車謂博士諸生曰化民成俗勸學為先

嘗聞疇昔輪奐之盛意不止是盍飭工掄材以復舊觀  
顧儀門卑隘弗稱從祀容服弗嚴越明年夏鼎新高闕  
賁飾貌象六旬而畢二堂亦告成又惟斯文與天地並  
必華棖岑樓式誌厥藏因重建尊經閣五楹里士忻然  
競助教授蘇君焱搏約學廩續其不給同知府事阮而  
麟翁提其綱庶工丕作民不知勞模掾韓君居仁叶畫  
展勤不愆于素秋九月閣成業我壯偉衿佩聳瞻咸曰  
六經如日月陟降庭止惠我光明扶人文以迪化原繼

使者之德且將以舊門及堂更立先賢祠正錄序繚以垣墉制度于焉大備蘇君請識成事於石某耄不能文惟諸侯之學載於禮詳矣在易臨之象曰君子以教思無窮澤上有地猶君子之近民也近民則禮達而教行建其牧立其監有師保之義凡以存天理淑人心而已矧是邦為詩書之鄉逸民之黃純孝之董文士之仕自漢以來為美談慶厯諸老模範後進淳熙大儒闡明正學惟聖賢是式惟德性是尊小為洒掃應對大而格物

致知如耳濡目染充然有得每孟春衣冠濟濟齒位秩  
秩司徒之教倫黨正之禮飲流風遺俗猶存未墜南豐  
曾公忠肅陳公繼為守貳表率董陶東諸侯莫逮焉春  
秋大復古學之復道之泰也夫不農不工何以謂之士  
非老非釋何以謂之儒行已有恥尚志仁義士之實也  
為君子儒夙夜彊學以待問儒之實也遊于斯肄于斯  
蓋亦踐其實副其名乎郡國有學昉於漢二千石所察  
惟曰好文學敬長上肅政教順鄉曲三代考行之意藹

如也升堂聞金石之音入牆見宗廟之美目作新之機  
而日新其德業孝弟忠信為根本明誠敬義為準的始  
於離經辨志成於知類通達用仰承菁莪樂育之仁不  
在茲時歟昔魯僖公能修泮宮教澤浹于海邦其俗秉  
周禮守經學一變至道聖人稱之誰謂魯遠道無古今  
師友淵源緒接洙泗頌其詩尚論古之人罔俾克廣德  
心專美魯之多士凡我同志懋敬哉歐陽子有言善教  
者以不倦之意須遲久之功禮行俗純然後為學之成

迺紀其始成以詔永久俾無怠冬十月乙亥前進士王  
某記

慈湖書院記

古者鄉有庠黨有序閭有塾里居有父師少師之教是  
以道德一而理義明書院之設意猶近古睢陽白鹿為  
稱首君周程朱呂治教之地文獻尤盛天典民彝之統  
紀賴以不墜東海之濱有太傅曰慈湖先生文元楊公  
立心以誠明篤敬為主立言以孝弟忠信為本躬行實

踐仁熟道凝清風肅然聞者興起可謂百世之師矣遺  
老見而知之後進聞而知之春木之茂兮其人若存兮  
此書院之所為作也古涪文公及翁紹其事不幸陷於  
浮屠氏鞠為荒榛闕不拯斯文繡衣使者侍其公行

部喟然歎息選一鄉宿望曹君漢炎為山長乃唱率善  
士念力叶力舍舊而新是圖相攸先生舊宅熙光故址  
爰契我龜鳩材庀工經之營之禮殿崇崇祠宇奕奕敷  
經之席肄業之舍規模視昔不愆于素旣旣衿佩游於



斯習於斯如升闕里之堂聞金石絲竹之音莫不油然  
而樂躍如而悟咸曰自堂徂基輪奐新矣陟降庭止惠  
我光明盍亦勉新德而進新知於是曹君暨賓錄長諭  
屬某著石章以永教思於無窮某耄且病辭弗獲敢誦  
父師所聞切磋商究之嘗謂儒以道得民師以賢得民師  
言賢不言道身即道也萬古一道萬化一心仁人心也  
人者天地之心也天有四時風雨霜露地載神氣風霆  
流形無一物而非仁則清明虛靜天地萬物為一體在

易為不遠復在書為精一在詩為無貳在大學為毋自  
欺在中庸為至誠篤恭惟先生無意而自得之齋莊儼  
恪非禮不動言性必曰堯舜論治必曰三代道學之將  
廢也則正色讜言不回於羣枉道學之復行則見幾卷  
懷不汨於勢榮耄期稱道若武公之作懿戒名滿天下  
若君寔之在西洛本心明而外物輕行歲語默叅諸百  
聖無不合於大易見先生潔靜精微焉於廣居賦見先  
生廣大高明焉於過庭訓之言學見先生自強不息焉

於講堂訓之言孝見先生一貫之道焉先生之文章皆性與天道之形著俯川流而仰高山即心之精神昭乎江漢秋陽之皜皜也居先生之居學先生之學則何以哉由事親從兄而盡性至命由洒掃應對而精義入神由內省不疚而極無聲無臭之妙下學上達不求人知而求天知庶幾識其大者而無一言一行之有愧可以欺其鄉不可以欺其家可以欺其家不可以欺其心無體之禮此心之敬無聲之樂此心之和訓詁章句云乎

哉先生之學文安先生之學也文安講論語於白鹿先  
辨其志聽者竦然動心收其放而存其良者在此朱文  
公亦云陸子所言專於尊德性學者多持守可觀又謂  
先生之學有為己之功合而觀之知入德之門矣有能  
約之以省察克治深之以薰陶涵濡問津於辨志尋源  
於尊德性以達聖人之海春融冰釋默契道體去先生  
之世若此其未遠也得心學之傳必有人焉濟濟多士  
克廣德心凡我同志懋敬哉

廣平書院記

乾道淳熙間正學大明朱子在建張子潭呂子在婺陸子在撫學者宗之如日月江漢光潤所被皆為名儒於是明有四先生其一曰廣平先生文靖舒公先生之學講於張而成於陸考德問業於朱呂融神會精知力踐其躬行有尚絅之實其誨人有時雨之澤沈楊袁三先生道同志合化東海之濱為洙泗位不配德而教行於鄉聲聞於天下淳祐中賁以易名先生有孫泌明經

世其學與計偕上春官屢不耦日始對策集英典教象山縣庠德祐初元請于郡太守謂年七十有一願挂衣冠歸老故里留寘閩幕不就退而細楹書啟迪後昆惟昔先生嘗題戶丹曰廣平書塾游於斯講於斯羣叟聚辯於斯先生沒門人敬事不怠肖像祠於塾迺適追先志奐飾堂序帥子若孫暨宗族之秀朝益朝習春秋舍菜先聖歲時朔望謁祠齒拜講說冠屨翼如誦弦藹如某聞而歎曰古道庶幾復興乎古昔士有常心家無殊

俗八歲入小學十年就外傳二十五家為閭閻有左右  
塾里中之老有道德者為左右師坐兩塾洒掃應對是  
謹詩書禮樂是習孝弟忠信是修蒙養豫教薰陶涵濡  
是以人有士君子之行士之子常為士漢唐之盛流風  
猶存經生守家法世族重宗譜子弟彬彬多賢然金籛  
之彥城南之勸識者謂誘以利祿非天爵之貴惟我國  
朝師道之立上接鄒魯冢宰所降之德司徒所教之倫  
父兄訓詔必是焉先其修於家者若睢陽戚氏子孫世

德之久南豐曾氏稱之若墨莊劉氏自太宗時至中興  
忠厚雖睦之風不墜朱子纂次其家傳槩舉一二言之  
可為士效法今文靖之孫亦服祖訓不違若稽家有塾  
之誼紹衣德言弗佚前人先用淑艾於家庭我有喬木  
殖德培之我有嘉苗種學楸之誼誼胄子在斯塾也于  
牆于羹如見先哲昏定晨省入孝出恭無非教受業講  
貫習復計過無非學張子序孟子說曰為己者無所為  
而然也魯子講魯論義利之章曰學者當辨其志是訓



是行服膺勿失由二先生之言得文靖之心百年如一  
日也國人稱曰文靖之後世世有人焉豈惟一家之光  
一國仁遜將自一家始詩曰有斐君子終不可諼兮又  
曰維其有章矣是以有慶矣文靖有焉子子孫孫勿替  
引之後之人其懋哉遂書以為記是歲乙亥夏四月初  
吉鄞後學王某記

先賢祠堂記

古之有道德者教於鄉里謂之鄉先生在鄉而祠於學

猶在國之祭於瞽宗也詩曰有斐君子終不可諼兮大  
學以為盛德至善民之不能忘也秉彛好德之良心千  
載一日况其邇者乎明自唐為州文風寥寥宋慶厯中  
始詔州縣立學山林特起之士卓然為一鄉師表或授  
業鄉校或講道閭塾本之以孝弟忠信維之以禮義廉  
恥守古訓而不鑿脩天爵而無競養成英才純明篤厚  
父兄師友詔教琢磨百年文獻益盛以大三先生之功  
也淳熙大儒疏濶灑之源而達之洙泗是邦諸老之學

始得江西之傳而考德問業於朱呂張子之門以尊德  
求放心為根本以顏曾四勿三省為準的闡繹經訓躬  
行踐履致嚴於進退行藏之際致察於善利理欲之幾  
明誠篤恭俯仰無所愧怍學者知操存持養以入聖賢  
之域四先生之功也前後九賢教行於一時澤被於百  
世郡學有祠久矣因鬱攸而廢至元甲午冬十一月洛  
陽狄公桂持蘆問之節行部至明既即庠序見諸生思  
所以啟迪斯文俾多士知所矜式有言隆典之未舉公

喟然曰茲立教善俗之原其可緩乃屬郡博士戴君友復舊祀十二月丙子朔公率守貳僚寮是安是奉以風厲士子丕遠耆老成人宅心知訓庶幾紹聞衣德言人有士君子之行衿佩竦瞻莫不訢訢曰善教得民心明使君有焉是祠之復其作新士習之機歟覺有先後道無古今高山仰止景行行止匪徒慕之亦允蹈之將有聞風興起者惟昔沛三輔有耆舊節士序魯廬江有名德先賢贊誼采摭舊聞述為小傳事有據依辭無溢

美用諭鄉之善士尚式時先哲之猷訓無斁是月壬午  
後學王某記

奉化社稷壇記

奉化社稷壇舊在縣南今秦辨之徙置西南二百步其  
後圯而復修迄今百三十餘年垓墮弗飭鞠為荆榛邑  
劇事繁自錢穀獄訟謂之不急舊儀空存嘉氣湮鬱旱  
澇札瘥民罔克入至元二十六年冬襄賁丁侯濟為尹  
寅念民人社稷之寄自古道重敢不祇肅稽經諏禮規

制一新社東稷西崇廣如式風雨雷師鼎列其次圭石  
有嚴植木有儀奠瘞之位齋祓之廬瑟祀揭虔勿替敬  
典明年正月告成迺率寮寮潔牲醴為民迓續豐年之  
貺雨暘時若穡人成功咸曰耿耿社哉于是耆老峻民  
屬應麟為記以識其耄矣無能然俎豆之事嘗聞之竊  
惟祀典行乎郡縣惟先聖先師暨社稷達天下亘萬世  
是尊是奉實為政教之本古循吏之先務而俗以為緩  
夫天生時地生財莫大乎土穀而有神司之后土后稷

以妥以侑明斯禮以治國其如示諸掌乎風散雨潤箕  
畢生焉周官之所禋燎也鼓以雷霆庶物生焉唐禮之  
所以同壇也是皆天道之至教神氣之流形春秋祈報  
曰民力之普存三時之不害亦惟德馨香祀清心正躬  
對越無愧吉圭薦信洋洋如在儲休錫羨燕及黎庶非  
知禮之原其能急流俗之所緩歟蓋庸敬在心斯須之  
敬在祭本乎地者親下幽則有神令於民最親政有臧  
否神異如響神之格思誠不可掩昔者古靈陳公宰百

里每過社稷孔子廟必下而趨化行習媿興於禮義今  
丁侯治邑三年師法前猷屏聲序音弦誦詩書以淑艾  
我士女又能務農重穀敬恭明神政教兼善藹然學道  
之遺風可書也已乃書以遺邑人俾刻諸麗姓之石用  
詔無怠

德潤齋記

史景純獨善先生之孫也謂某曰范卿之幼也大父命  
名曰潤以德潤為小字衣言服訓不敢忘迺以德潤扁



讀書之室朝夕瞻省適追祖武念德不忘庶無墜教成  
之意願子為之記余謂獨善先生名其孫蓋取諸大學  
詒燕後昆眎范喬之硯魏暮之笏未若斯言之寶也誠  
意之義先儒闡繹既詳曷敢贊一辭昔嘗讀易大傳至  
於三陳九卦首以德言之此涉難處變之法聖人所以  
痛後覺也九卦之中履以澤為德之基井以水為德之  
地基者德之積地者德之厚惟其積則吾身之涵養為  
淵泉之溥惟其厚則吾身之和順為時雨之化世故緼

紛人以我為子綦之槁木吾方浩浩乎無悶末俗混濁  
人以我為壺丘之波流吾獨皦皦乎自潔道腴可味不  
以脂膏自潤仁宅可居不以富貴為潤得時則澤潤生  
民卷懷則玉在山而木潤孰非是德之流行夫河潤九  
里漸如三百步溝澮之盈其涸可立待有本之與無源  
也閔之於安潛之於侃身雖否而常華之是似或之於  
淑超之於鑿身雖泰而析薪之弗荷由今觀之孰榮孰  
枯景純永惟承家之重嗣守之艱兢兢乎奉槃水而執

圭璧于羹于牆儼若著存步繩規矩率乃祖攸行豈惟  
一身之潤而百世之澤有行勿替詩曰有斐君子終不  
可諼兮大學所謂盛德至善將於獨善之門見之顧名  
思義景純其懋哉

序

天禧編御集序

詞科第三場首題

宋受命於穆清五緯集奎觀人文化天下維三葉重光  
真宗章聖皇帝濬喆欽明體堯蹈舜游意藝苑積思書

林睿藻天葩輶轄元化慶霄在上萬物五色宜刻玉版  
歲金匱垂訓悠遠以三二典七六經天禧之元月旅黃  
鐘日躔庚子臣虛已稟次御集百二十卷爰即禁庭俯  
示丞弼明年孟春嚴儲於繼文殿四年季夏甲午列局  
崇文分命注釋仲冬庚申出聖製七百二十二卷畀輔  
臣五年季春庚子欽奉御集尊閣天章定著為三百卷  
仲秋庚午歲之名山以副墨頌焉赫乎盛哉集有序篇  
實出御製五年正月癸卯借聖政紀序名邇列觀之臣

瑛臯翰墨衣被昭回之光稽首書下方曰帝王之文即  
天地自然之文仰而觀則七政三辰之炳耀俯而察則  
山川卉木之彪列帝堯煥有文章文王經緯天地繇此  
其選道心淵粹發為英華聖學精微寫為謨訓豈有意  
於文哉昔黃帝丹書及銘傳至周漢聖文裒集其昉此  
乎高文有傳著在七畧武帝有集始析二卷正觀開元  
成集並垂理媿於辭駁亡以議惟我藝祖紹天覺民贊  
述孔顏道統復續太宗繼序緝熙光明皇文揆天籟勺

宇宙臣文仲編為三十卷臣彭年編為二百十四卷燕  
謀詔異用敷遺於章聖厥既北警輦允西縻靈夏幅員  
清謐威械戢歲升中岱宗展采汾陰禮葉樂華歲蕤蔥  
舊帝益思持盈制治啟迪化原乃增講員乃御延閣左  
右圖籍鎔經鑄辭綠字瓊章壁明奎粲歌有念農閱兵  
奉先為政豐年觀麥喜雨瑞雪之屬斯元首薰風之雅  
詠也論有勤學崇儒祥瑞解疑思政敬器為君難寬財  
利之屬斯畫卦重爻之邃學也龍閣有贊聖文有頌元

龜有序泰山有銘庇民有述修河有碑三記五箴之作  
清景百篇之製經史徧詠明良載賡肆筆而成戛切韶  
濩帝心謙翬未議彙輯祥符四禩九月丙子臣敏中請  
錄宸章襲歲渠觀而文頌歌詩十五卷上於五年四月  
癸卯號登天禧遂金聲玉振而集大成臣竊從太史氏  
欽覲集目凡頌碑銘贊之卷二十六詩歌辭章樂府之  
卷一百十四論述序箴條記文書其卷四十正說承華  
要畧靜居玉宸法音集其卷四十有五春秋要言五卷

臚分試題表詞卷別七十芸籤鈿軸數盈三百視慈福  
殿所觀為益備雲漢之章風行水上之文作者不可為  
已鴻生鉅學屬辭摘藻有三代風非金玉追琢之功鳶  
飛魚躍之化歟抑臣閱闕國史祥符丙辰之春開資善  
訓元良箴規歌吟日賚用錫天禧四禩仲冬甲戌臣殊  
編摹賜東宮御製成五十卷育蒙泉之德培豐水之仁  
帝範金鏡訓戒等書方斯茂矣文子文孫監先憲酌祖  
道至于萬年永保民罔不自斯文始臣謹表而出之乾



興初元八月辛亥以是集錫該輔併識于篇以鋪揚我  
宋重規疊矩之盛美臣謹序

詩考語畧序

漢言詩者四家師異指殊賈逵撰齊魯韓與毛氏異同  
梁崔靈恩采三家本為集註今惟毛傳鄭箋孤行韓僅  
在外傳而齊魯詩亡久矣諸儒說詩一以毛鄭為宗未  
有參考三家者獨朱文公集傳閱意眇指卓然千載之  
上言闕睢則取康衡栢舟婦人之詩則取劉向笙詩有

聲無詩則取儀禮上天甚神則取戰國策何以恤我則  
取左氏傳抑戒自儆昊天有成命道成王之德則取國  
語陟降庭止則取漢書註賓之初筵飲酒悔過則取韓  
詩序不可休思是用不就彼岨者岐皆從韓詩禹敷下  
土方又証諸楚辭一洗末師專已守殘之陋學者諷詠  
涵濡而自得之躍如也文公語門人文選註多韓詩章  
句嘗欲寫出應麟竊觀傳記所述三家緒言尚多有之  
罔羅遺軼傅以說文爾雅諸書萃為一編以扶微學廣

異義亦文公之意云爾集傳者或有考於斯

跋

跋袁潔齋答舒和仲書

右潔齋袁先生答廣平舒先生和仲書擬其要切者如  
昔子朱子有言子思教人之法以尊德性道問學兩事  
為用力之要陸子靜所言而是尊德性潔齋先生之學  
陸子之學也觀其尺牘皆勉學之要言蓋尊德性實根  
本於學問未嘗失於一偏是亦朱子之意也所謂但慕

高遠不覽古今務為高論不在書策者箴末俗之膏肓  
至深至切所謂古人多識前言往行日課一經一史斯  
言也學者當書紳銘几晝誦夜思尊所聞行所知可不  
勉歟至於因晚楊梅之餽推之於大才晚成此格物之  
學一草一木之理必致其極節或虧於晚學或倦於耄  
俛焉孳孳不知年數之不足尤當以是自儆書不云乎  
汝丕惟商考成人宅心知訓嗟爾後進惟憲法是式沈  
潛乎經術貫穿乎史籍外以致用內以崇德費隱一原

敬義俱立應正學之不墜尚前修之可及王應麟識

四明文獻集卷一

欽定四庫全書

四明文獻集卷二

宋 王應麟 撰

赦文

咸淳三年郊祀大禮赦文首詞

內制正月一日

門下朕嗣受丕基適求彝憲正月上日類于帝率惟虞  
帝之初昊天成命殫厥心祗若周郊之始永懷先烈敷  
遺冲人既付中國民慨救寧之匪易無疆大歷服凜持  
守之惟艱顧菲薄懼弗克勝而兢業未知攸濟三垂庶

定益思戒備於不虞八蜡雖通猶慮豐穰之難必無日  
不惕賴天之靈并絡奏勲寢恢舊宇臘雪呈瑞實兆有  
年汜可少康敢曰能饗載稽隆典之詔仰法至道之規  
維泰時之肇禋于孟春之朔旦以大報本式教用休然  
念黍稷非馨必至治而神明感牲醴以告必嘉德而民  
力存其悲忱辭惟予實意蓋嘗崇節約之制廣振貸之  
仁屏遠僉壬申儆貪墨凡立政立事灼知厥若庶在宮  
在廟不顯亦臨敷前人之大功乃建鴻號秩元祀之將



禮乃消熙壇相維辟公初見宗祖恭館奉幣長發其祥  
太室裸圭遁追來孝儼一純而對越輯衆正以佺從備  
巾車五路之容肅甘泉萬騎之衛鳴玉鸞於蒼龍之駕  
履銅律於青陽之歌有本有文盡物盡志霽景格時暘  
之應慶霄宣葉旦之輝迪惟寅畏之忱用答縉紛之貺  
於是被袞而薦鬯昇丘而歛柴合祛兩儀協乾坤之交  
泰陟配二后昭功德之蕙隆賓八鄉于桂尊穆東皇于  
瑤席神鷄吉而高旂澹星彪列而煥幄光燕祉皇天馮

馮翼翼介壽文母怡怡愉愉迄用有成俾爾單厚飭躬  
奉祀以蒙嘉氣敢專享於蕃釐行慶施惠以及兆民盍  
丕承於鴻造予其大賚咸與維新可大赦天下

尾詞

於戲相上帝寵綏四方惟始和而觀治象建皇極敷錫  
五福惟好生以洽民心蓋春者德之元而祭者澤之大  
尚賴股肱爪牙之勵翼翼岳牧侯衛之布宣永敷萬國之  
歡勿替億年之敬

德祐元年明堂大禮赦文首詞

九月十四日

門下朕嗣大歷服迪前人光皇天既付中國民敬事之心敢怠明堂以教諸侯孝肆祀之禮有常惟懷永圖未堪多難菲德弗類上以累三光之明柄任匪人下以稔外夷之患鴻鴈哀啓而靡集蛇豕薦食以無厭並告神祇以與爾衆請命有指疆土肆予冲人思艱恃太母保右之慈去累歲凶邪之蠹更化而行善政籲俊以彊本朝黎元之心寢安將士之氣復振往求攸濟曷惠其寧

祈永命惟在德元敬明神宜無悔怒念天地好生之初  
意界矜萬邦而祖宗不殺之至仁垂裕億載有嚴大饗  
其悲忱辭惟紹興尚質從權寅必弭兵之祝惟淳熙齋  
精歲事率循越紼之規茲救寧圖於武功乃儀式刑于  
文典聿懷在疚之戚矧當孔棘之秋肇裡維清大禮必  
簡屏黼繡周張之飾優霜露悽愴之思命輔臣而款真  
宮咨宗屬而裸太室心感通於三方之輿躬陟格於九  
几之筵報本合祛尊祖並侑圭幣始薦屬屬然如弗勝

蕭脂載燔洋洋乎如在上牲醴之馨則無讒慝染盛之潔  
則曰豐穰秩祐申錫無疆並况惟予有慕月星明概用格  
熙成乾清坤夷庶克者定歸胙介怡愉之寄肆耆布寬  
大之條聰明自民蓋上帝臨下有赫恭默思道謂百姓  
有過在予閔征戍之勤勞惻邊陲之荼毒汔可少息咸  
與惟新俾汰膏澤而鏡至清用開治原而導和氣可大  
救天下

尾詞

於戲皇極敷言于帝其訓敢專五福之膺我將既饗畏  
天之威永保四方之人尚賴股肱咸一德之輔熊羆不  
二心之臣合謀計安攘狄復竟協成順信之助丕集昇  
平之勲

自似道喪師國事危急將士離心兵出屢衄朝廷方自  
理明堂科舉等事至于束手無措乃議納土求封為小  
國賫降表使  
燕京哀哉

舉廉吏詔

詞科

勅門下周聽治以六計廉善居先漢辟士以四科清白

為首朕灼知有俊誕保受民惟前代迪厥官不肩好貨  
凡正人羞其行庶幾成風嘗賜札以律貪復作銘而申  
訓曾是在位猶從匪棄鞭鞞不已而寵賂章篋蓋不飭  
而節行缺退食鮮羔羊之節虐民多碩鼠之譏念激濁  
在於揚清而瘳惡莫如彰善神爵獎朱邑之潔治盛循  
良開元旌王丘之廉風移苛矯一賢蒙擢百辟鄉方肆  
公道之天開閔顏波之瀾倒克正罔敢弗正既昭德以  
塞違進良以率不良與厲精而更始咨爾承休之彥體

予美俗之懷廉欲得其真公選潔修之士舉皆賢于已  
博詢操履之原內則如光祿之薦王嘉外則如河東之  
察黃霸人之有猷有守具以實言予其懋賞懋官亦克  
用勸故茲詔示想宜知悉

按詞學指南云周官御史掌贊書注云若今尚書作詔  
文秦改令為詔漢下書有四三曰詔書其文曰告某官  
四曰戒勅其文曰有詔勅某官唐正觀未張昌齡召見  
試兵詔此試詔之始也其後學士試批答皇朝西掖初  
除試詔紹興試格止曰戒諭如近體  
誠諭風俗或百官之類紹興改為詔

### 舉將帥詔



勅門下朕監徹桑未雨之戒軫采薇治外之憂熊羆又  
王家昔何多於英傑蛇豕食上國今未救於疆垂風寒  
僅數處以護吳道敝欲多方而誤楚荆益慮深於唇齒  
湘廣備缺於腹心雖錫斧鉞而啟元戎猶聽鼓鼙而思  
猛士食靡忘於鉅鹿志孰奮於伊吾內無舉奉世之臣  
外乏代崇文之將朕為拊髀戎將生心昔高廟歲舉六  
科智勇是選孝祖薦格五等謀略為先率由舊章深詔  
執事詩書如卻穀豫思元帥之儲策慮若陳湯勿求稽

行之備搜異能於藪澤拔竒節於偏裨爪牙官備不虞  
杞成固圉之續履屐間得其任無媿知人之明惟爾之  
能求朕攸濟故茲詔示想宜知悉

東萊先生曰詔書或用散文或用四六皆得惟四六者  
下語瀆渾全不可如表求新竒之對而失大體但觀前  
人之詔自可見 西山先生曰王言之體當以書之詰  
誓命為祖而參以兩漢詔冊 朱文公曰三代詞詰誓  
命皆根源學問教陳義理 兩漢詔令  
辭氣藹然深厚爾雅可為代言之法

科舉詔

勅門下國家用儒之効與三代比隆朕紹休聖緒于今

四年粵若恭默之時亦既選士未遑親策茲將進于庭  
而問焉仰惟仁祖臨軒之初太史奏雲瑞名臣輩出施  
之事業碩大光明朕甚慕之先帝道久仁洽凡今宗工  
獻臣莫非豐芑涵濡之澤燕詒我後顧惟天下之才無  
窮而對闕之亦有無窮之用思昔敷納以言明庶以功  
興賢與能出長入治所取皆有用之實爰自以文設科  
視古寢異然經術詞章所以覘濟時之蘊徒文乎哉學  
問粹而器識宏其文渾厚雅正實用于是不見朕既臨

雍表章儒先首善崇化以風四方矧景運維新協乎五  
緯聚奎之歲爾多士其必躍然興起矣蓋飭操履以培  
其本明理義以浚其原勿事穿鑿勿尚浮靡以稱作人  
之寔意羣有司尚亦公爾攷擇明爾鑒裁俾抱負器能  
之士惟朕時舉庶得賢立太平之業式克迪前人光其  
率朕志無斁

日食求言詔

勅門下惟天降割我家嗣君幼冲未堪多難吾以衰耄

勉同聽政明不能察奸臣之誤國仁不能救強敵之殄  
民德澤弗流政令多失乖氣致異適見於今迺季夏月  
朔日有食之既陽微晝晦變莫大焉吾惟艱危之會憂  
心如薰重以災異謹告于何不臧厥咎在吾痛自克責  
貶損尊號猶恐未盡應天之寔方與嗣君夙夜祇懼省  
躬悔過慨念奸臣顛政之久杜塞言路蒙蔽天變下情  
壅於上聞禍至此極今吾大警悟大懲艾虛心以改惟  
人言所以達天意咨爾百僚士庶盡忠極言凡涼菲之

愆政事之疵黎元之疾苦爰暨攘夷固圉之長策可以  
銷惡運導和氣者毋有隱諱將采擇施行人心悅而天  
怒解庶其在此布告中外體吾至意

資政殿學士江萬里上表再辭免同知樞密院  
事不允斷來章批答

省表具知朕惟文事必有武備聖人經綸之學易為之  
原于萃曰戒不虞于既濟曰思患豫防以幾深之畧圖  
久大之規卿素學也在我烈考未究遠猷用敷遺于冲

人登貳宥密庶幾本彊而精神折衝厥有嘉言以教告  
朕曰敵情之往來叵測邊備之科瑣當嚴乃言惟服尚  
式萃既濟之訓協謀籌帷日申倣以討軍實時閒暇以  
明政刑率惟救功昭乃辟之有又亦有無窮之聞懋哉

欽予時命所辭宜不允仍斷來章

萬里臨事不能無言似道惡之似道以去

要君帝涕泗拜留之萬里以身掖帝云自古無此君臣禮陛下不可拜似道不可復言去似道舉笏謝曰微公似道幾為千古罪人然益忌之帝嘗問經史疑義及古人姓名似道不能對萬里從旁代對帝語王夫人以為賢後力請援襄樊不報遂力求去出知福州年七十三矣大兵入饒州赴水死

賜文天祥辭免依舊權工部尚書都督府叅贊  
軍事江西安撫使除浙西江東制置使知平

江不允詔

勅天祥省所奏具悉朕未堪多難疆圉孔棘御事罔不  
日艱大天恣我成功所惟時魁儒秉忠倡義獎率三軍  
入衛社稷國勢為之增重人心恃以為安精神折衝文  
武是憲若稽高廟命臣願浩開制閩于江淞宏濟中興  
之業者定武功卿器度才猷克邁前哲惟長江之險要



未復畿甸之備守當嚴命卿以太常伯兼領二使表裏  
撐拓以固吾圉東西運掉以沮敵氣儒帥一臨士氣百  
倍用保乂我文祖受命民茲惟豐芑詒謀之意亟其馮

牙紆朕宵旰之憂所辭宜不允

天祥寶祐四年進士第  
一初帝御集英殿策士

名公覆考考第既上帝欲易第七卷寘其首公讀之乃  
頊首曰是卷古誼若龜鑑忠肝如鐵石臣敢為得士賀  
遂以第七卷為首選唱名乃天祥也自宋有國上親策  
者三人太祖朝張齊賢高宗朝張九成理宗朝天祥  
此所謂魁  
儒者是也

賜顯謨閣直學士兩淮安撫制置使知揚州李

庭芝築城獎諭詔

勅庭芝朕適駿先猷儀圖外治程伯之率淮浦既立武  
以修戎山甫之城東方爰任賢而賦政眷言揚土之屏  
翰粵若相臣之旬宣無競維人屹金湯而鼎立有截其  
所萃壁壘以星聯相攸西北之隅哀時形勢之要允懷  
勝算孰替膚公卿儒雅折衝謀謨經遠增二萬列屯之  
備懋七年善政之勤未雨而綢繆無日不申倣謂分營  
於箕翼必設險於帶襟如山之苞控仁愿三城之會因

地之利倣仲淹大順之規定墉寔壑而幹方廼疆廼理  
而築室不愆于素俘來以圖召伯有成王心則寧載嘉  
爾績魯侯之功海邦是若永乂我民故茲獎諭

賜呂文德收復開州江面肅清獎諭詔

咸淳三年十一月十一日

十一月十一日

勅文德朕懋采薇治外之勤謹徹桑未雨之備日申倣  
軍實無競維人天啓我成功所助者順狡焉強敵竊據  
開城哀亮鞠頑弗顧佛狸之識折衝厭難靡忘鉅鹿之

思卿策慮適于神明忠忱衛于社稷奮鷹揚之勇卯詔  
辰行率虎闕之師風驅霆擊我環攻而氣倍彼株困而  
技窮旃裘之援莫前金湯之險逆復膚公甚雋勝勢用  
張巴夔西土之喉衿既克救定襄峽上流之唇齒猶肆  
窺覷恃吾有以待之惟卿獨能平爾以身督戰先事候  
情百將一心凡履屐間當任四牡三捷從枕席上過師  
運竒伐謀并力逐北俾投鞭之衆遠遁而阻隘之羣一  
空沆奏肅清之勲深嘉扞禦之略荊州通蜀而用武朕

方觀葛亮之規募江許出軍而告成卿尚圖名虎之事業  
益恢疆宇丕耀旂常故茲獎諭

賜淮西制置大使夏貴獎諭詔

勅夏貴朕惟盛夏逾半分陰易流諸路勤王兵已集望  
卿獎三軍以清江面惟長淮以西倚卿為金城守廬復  
築通江北之咽喉屢戰屢捷北敵膽寒進師濡和則建  
業當塗有克復之期奏六月之膚公報先帝之殊遇在  
此行也卿謂水陸並進隨機用事知勇明決允契朕心

亟其合熊羆之士掃蛇豕之穴獻歆清廟飲至京師宗社生民之福豈惟予一人以寧故茲獎諭

賜淮東制置大使李庭芝獎諭詔

七月二十八日

勅庭芝惟天付予有家冲眇未堪多難蛇豕薦食覃及畿甸維揚截然中居若防制水恃以無恐寔惟禮樂詩書之帥秉忠藩翰王略且戰且守屢奏膚公邇者舟師不利江氛未清根本之謀我是用急趣卿入衛疆本折衝庶幾籌幄可以決勝奏章來諭表撐裏拓之慮甚密

申徵軍實招選勁兵將有造闕之期朕維寵嘉之已命  
夏貴旬宣兩淮卿侯貴開閩亟率將士星馳來朝國人  
望卿如望歲焉商飈已肅分陰當惜戒我戎旅不留不  
處罔俾常武之功專美有周故茲獎諭

賜知夔州張起巖獎諭詔

八月二十二日

勅起巖朕惟聖人有金城所恃者節義之士惟德不明  
姦臣誤國分閩守圉之臣接踵畔降長江失險延及上  
流每歎國家三百餘年仁厚涵育豈惟一顏平原者自

荆峽不守蜀道未通將士勤備禦而不得撫勞黎元苦  
兵革而不得拯救乃睠西顧宵旰不遑寧湖南帥臣帝  
以卿所奏帛書來上知卿忠忱義槩堅守夔門誓與軍  
民赤心圖報中流砥柱疾風勁草于卿見之方以久不  
聞蜀事為急卿獨間關險阻馳奏於危急之衝有臣如  
此國勢增重彼負國賣降者真可愧死卿又糾率義旅  
尅復開州斬使焚書誓以滅賊為期朕嘉歎不已趣命  
授卿正任承宣使領廂部之師以示褒賞天助者順師



出有名強敵逆天平殄有期朕已去姦進賢改紀其政  
中外人心踴躍思奮卿其獎率軍民益嚴戰守如昔璘  
玠之保蜀敵愾獻功朕於節鉞無所吝卿之忠義旂常  
竹帛有光焉故茲獎諭

賜李庭芝獎諭詔

勅庭芝朕未聞多難北人率我螽賊以來搖蕩我邊疆  
狡馬窺淮之謀將塞餽餉之塗卿以股肱之良任方面  
之重激昂將士指授方略維時熊羆不二心之臣合謀

同力人百其勇誓必剪滅此而朝食師直為壯天助者  
順大捷於灣頭再捷於淮安三捷於寶應執訊獲醜來  
奏膚公威靈赫張可以舒華夏之氣警旃裘之膽卿為  
東陲金城修扞維艱以集雋功朕維寵嘉之乘戰勝之  
威掃敵壘而空之則卿之勲業暨諸將功名昭垂竹帛  
於常武淮浦之詩有光其益勵忠臣義士堅守於內力  
戰於外糾合精銳霆擊風驅壹大治之使匹馬隻輪無  
遺者用成攘夷復竟之不績朕所望于詩書之帥也戰

多之賞已眊功行之指期肅清高爵秩無所吝比爾將士咸體朕意故茲獎諭

責諭賈似道歸里終喪詔

德祐元年五月四日

勅似道吾聞忠孝臣子之大節命義天下之大戒卿受國家之殊遇居將相之重任邇者督師弗績感國憤軍人言沸騰欲正其罰吾與嗣君念卿服勞王朝務存體貌俾歸里終喪用彰孝治吾於待元臣之禮至矣聞卿安處維揚未即就道公議全涌皆謂臧孫紇如防春秋

大義凜如霜日君令臣從焉可違也吾惟卿素以忠孝  
自負必不固違吾命以虧事君事親之道凡羣臣所奏  
姑惟置之今歸塗未阻可以退修初服盡禮倚廬而猶  
復翱翔淮壖忠孝昏失進退無據大臣出處當如是乎  
茲命李庭芝宣吾與嗣君忠厚之至卿其亟歸喪次以  
盡臣子之道以弭公議之責固當曲示保全否則衆論  
益甚名教靡容吾雖欲屈法伸恩而不可得卿尚明聽  
吾言善始以終亦有辭于永世故茲詔示

時似道罷平  
章都督予祠

上表自劾太后有旨令李庭芝津遣歸里終喪留維揚  
不行王鏐奏似道既不成忠又不死孝降詔以責云云  
六月似道歸紹興閉城不納羣臣交章論誤國喪師之  
罪連貶竄遣鄭虎臣監押之嶺南至漳州木綿庵即廁  
上拉其  
脅殺之

勉諭江西制置大使黃萬石置司隆興府詔

七月

五日

勅萬石昔晉庾翼移鎮樂鄉王衍謂江渚有虞不相接  
救方岳重將當居要害之地為內外形勢言兵者避之  
今天塹失險深入堂奧南昌為江西一都會襟帶中流

高廟命李綱為大使鎮是邦此中興宏規也卿志慮忠  
寔才猷開濟屬大事當一面吾以綱之任命卿精神折  
衝人心恃以不恐聞卿駐兵臨川氣勢猶未翕合商飈  
已動分陰當惜戰守之計不容緩卿其趣提師旅開閩  
南昌與守臣協圖備禦乘機合謀必以克復江地肅清  
氛祲為期詩曰戎車既駕四牡業業豈敢定居一月三  
捷卿其懋哉故茲勉諭

賜利西路安撫副使兼知涪州陽立詔

六月二  
十二日

勅陽立敵為不道偷渡長江似道督師不戰而潰誤國  
殄民以至金陵京口皆失守兵氛延及近甸冀四方忠  
臣義士來救國難以拯民命賴天之靈輔臣協圖屏黜  
似道蠲除蠹國害民之政人心頓回盡力戰守叛將凶  
酋相繼殄滅然後宗社僅安京師稍定天未悔禍江陵  
之事必駭吾聽蓋郵傳阻隔未知似道已黜是以人無  
固志惟卿智略輻湊忠氣慷慨秉忠仗義董率精銳進  
于三峽奮勇鏖戰立功甚雋吾與嗣君聞之嘉歎有臣

如此可以滅敵朝食望卿之來以刻為歲昔楚申包胥  
求救于秦立庭墻勺飲不入口况卿膺閭寄之重必能  
投袂纓冠赴國家之急已擢卿正庶車之任其亟星馳  
露次救我艱危或湖北路梗盍取間道疾驅而來勤王  
奏功吾於高爵懋賞無所吝故茲詔示

賜四川制置副使兼知重慶府張珩詔

勅張珩吾擁祐嗣君未堪多難似道誤國潰師兵禍極  
矣國事急矣以卿忠忱壯槩著勲西蜀用授節鉞聯亞



保分蜀閬之寄今敵兵迫近其憂有重於蜀者已出六月之師趣諸將進討猶慮氣勢未合如卿義勇奮發吾望卿來如望歲焉同室有鬪纓冠往救鄰國有難頓首出師卿忠義資神明其恐立視國家之急乎其亟獎率三軍星馳電邁或湖北路梗即從間道入援詩曰王于興師修我戈矛與子同仇吾所望於熊羆不二心之臣也時珏知合州屢捷復盧涪二州元兵以不和而潰趙定應乘間迎珏入城珏至遣將四出元兵屢敗也速反現復園之克之珏死於難

賜答萬壽詔

勅萬壽自北敵飲江薦食近畿國勢岌岌秋風已動後  
憂方大卿忠義謀略名冠西州敵所畏者唯卿耳纓冠  
授袂以救國家之急此卿之志也吾與嗣君簡注已久  
屢放手札久諭丞相馳書仍遣顯使銜命趣召未知使  
者已達吾意否乎諸將雖已進師未有統帥天其或者  
待卿以成肅清恢復之功今再遣某官趣卿來卿忠忱  
體國必能提精兵率良將取間道鼓行而前星馳入衛

以殄滅此寇為期將士聞卿來朝壯氣百倍彼不足平

也時萬壽不至  
後以蜀降

賜左相陳宜中勉諭造闕詔

七月二十四日

勅宜中北敵憑陵姦臣潰敗惟卿屹然為宗社之柱石  
討亂賊去凶邪收黎元之心作將士之氣國勢漸振皆  
卿之功彼何人斯挾私肆毀吾知此書詐也卿何嫌何  
疑翩然出關命使者趣卿歸造于朝而出晝不少留吾  
與嗣君朝夕俛望忘寢廢食卿忠義貫日月必惻然動

心矧秋風已動敵謀日深廟堂僅一右相科瑣邊吏唯  
卿明習守禦孰緩孰急將士孰勇孰怯指授處置之方  
畧分陰不可緩卿為國計盍幡然而來或不念吾老幼  
之瘵疾獨不念先帝之殊遇乎卿以安社稷自任當危  
急存亡之秋豈忍舍去亟入政事堂圖所以克敵復竟  
之策再命從臣勉諭尚體吾懇切之意

宜中與王燿不  
協會留夢炎自

江南入朝燿宜中皆請相夢炎而乞去燿即就民居以  
丞相府讓宜中宜中言一辭一受何以解天下之譏因  
辭去遣使遮留之後宜中以親辭  
太后自為書遺其母楊氏乃赴召

又

吾自丞相出關憂心如薰屢遣使再下手詔趣丞相造  
闕閔閔如望歲而未有來朝之期諫臣抗疏謂丞相當  
竊臣憤師之後轉危為安勲在宗社指授處置諸將信  
服國難孔棘此何時而可舍去覽之憮然維危急之秋一  
木支厦罔不曰艱大二相協力扶持度克有濟古社稷  
臣不輕於進退矧受任艱難之際不止身佩安危而已  
前日之去固知丞相之心有大不得已者吾既察姦誣

之蹟盍幡然而來都人之瞻徯至切將率之意嚮易睽

其亟回公府用圖戰守之計沆成美功

時宜中以母老辭歸永嘉詔趣

入覲國事已不可為矣伯顏進兵高亭山請執政議事宜中夜遁乃以賈餘慶為右相吳堅為左相丙子廣王益王由海道趣温州蘇劉義陸秀夫來會宜中海船泊清澳門諸人往見之共議興復益王登位宜中復相後奉二王入海如占城乞師遂不還

按公所草賜詔自勉諭黃萬石以下數篇寔足以興起人心然當紀綱大壞之餘強藩大鎮惟思叛國以圖富貴其肯聽其辭命以赴危難乎此宗社之所以沆於滅亡也

勉諭王爚陳宜中

德祐元年五月二十日

遭家不造國難孔棘民自擇相吾與授之如光公者皆  
中外之人望所冀訃謨遠猷共濟艱難今人心寢回援  
兵漸集此二相協力經綸之功夏已逾半正當惜分陰  
以圖攘却時樂易失敵謀難測吾朝夕凜凜外議謂二  
相頗有不和之迹覽輔臣奏疏憂愛懇切謂定大計於  
危疑誅大姦於倉卒勲在王室初無輕重何嫌何疑而  
至是吾惟丙魏同心房杜濟謀在平時猶然况危急存  
亡之秋乎盍念國事之艱協心同德日入都堂共議扶

持宗社拯救生民之策勿以細故妨大計

賜夏貴

七月十一日

卿以身殉國家之急提兵力戰屢聞捷奏比者丞相奏  
事言卿素有勤王之志欲率義旅入衛惟江面未清少  
遲其行今秋風已動國事孔棘所憂在於本根吾聞淮  
西之兵多忠勇其民皆勁健卿舊德宿望諸將心服以  
樞府董六師吾事濟矣西閩之任卿宜暫委參佐丞戒  
徒馭組合熊羆之士援柝誓衆星馳而前以救危難尚



念兩朝殊遇朝聞夕道吾之待卿猶唐之待子儀也

此漢

口陽羅堡喪師  
之後促之不至

賜李庭芝

二十四日

吾擁祐嗣君遺大投艱于身敵人憑陵國步孔棘妖巢  
狡窟猶未掃除西風已動憂端方大卿文武為憲精神  
折衝分鉞十餘年威望具孚卿嘗有勤王之志吾念淮  
壩為畿輔屏蔽倚成攘夷復竟之功今兵氛未退尤以  
根本為慮運籌決勝宜得知兵之儒協贊廟謨邇者命

卿參預意實在此久當方面練習兵事無踰卿者用遵  
慶歷召琦仲淹故事趣卿入輔指授當任可以破堅處  
置得宜可以平蔡其功倍於臨邊矣已命夏貴宣威兩  
淮趣其入維揚貴到卿即率良將勁兵星駕來朝惟時  
惟幾分陰不可緩卿其念之

時以夏貴為淮東制置召  
庭芝赴行在夏貴不受代

庭芝開  
門自守

### 賜夏貴詔

吾趣卿來朝共濟時艱重惟秋風強敵未退以卿英名

宿望精忠義槩固欲卿入贊帷幄以壯根本但念維揚  
屏蔽淝右必淮堧保金湯之固則敵人有後顧之慮畿  
甸可恃以無虞今命卿旬宣之寄兼領兩淮卿忠忱體  
國宜星言夙駕以副注倚之意

貴因陽羅堡喪師沿西  
南岸放火歸廬州其心

已無國矣詔屢  
促之其肯來乎

### 勉諭夏貴詔

自敵騎飲江國步孔棘卿獎率三軍誓不與之俱存百  
戰而氣不衰砥柱屹立于衆流橫潰之衝肆命卿以宣

威開大閩於兩淮庶幾首尾相應茲覽奏牘知裕溪之  
役行師失利卿跋涉險阻受任危難之間勞瘁至矣其  
撫勞將士集收精銳謹固秋防以圖再舉惟天助順有  
志竟成機會可進趣鎮維揚用集攘除之績

賜文天祥詔

卿倡義旅以衛王室秉忠忱以濟時艱爰咨常伯之英  
趣膺制閫之寄將士用命遂汛掃於兵氛精神折衝益  
振揚於勝氣有嘉體國之志亟奏克敵之勲元戎先行

周邦咸喜載加錫賚式示眷懷

時天祥以江西提刑入衛陳宜中去位夢炎獨

相意不相樂乃以天祥守吳門除浙江制置知平江府

### 勉諭陳宜中詔

吾惟艱危之時卿以忠義一忱扶持宗祏一日去位吾如失左右手惠然肯來再登右揆用景祐名相茂典以遂謙冲之美國事日棘人心易搖非卿誰與鎮安羽書狎至諸將出師非卿誰與措授豈可以辭避之小節忽安危之大計邊境肅清國勢底定然後從容養志之樂

可也今何如時而欲辭位趣承渙命以副具瞻

獎諭張世傑詔

卿首倡忠義率旅勤王屢收雋功攘却外侮英猷壯槩  
每懷嘉績歎敵謀叵測闕東淮之餽餉窺右澗之腹心

我是用急卿進兵江潁焚其聚糧牽制其勢使不得逞

嘉乃茂績用錫褒書其率勵三軍乘勝電擊掃清戎壘  
以定王國

四明文獻集卷二